

PEMBERITAHU PERTANYAAN DEWAN RAKYAT

PERTANYAAN : LISAN

**DARIPADA : PUAN KASTHURIRAANI A/P PATTO
[BATU KAWAN]**

TARIKH : 8.3.2017

SOALAN :

Puan Kasthuriraani A/P Patto [Batu Kawan] minta **PERDANA MENTERI** menyatakan bilakah mata pelajaran pendidikan seks akan dimasukkan di dalam sukatan pelajaran dan nyatakan dengan terperinci apakah sekolah-sekolah terpilih yang mengajar pendidikan seks dan apakah sebab sekolah-sekolah tersebut dipilih dan bukannya semua sekolah Kerajaan memandangkan insiden jenayah seksual terhadap kanak-kanak semakin meningkat.

JAWAPAN

Tuan Yang di-Pertua,

Susulan daripada kelulusan Kabinet pada 20 Disember 2006, Kementerian Pendidikan Malaysia (KPM) telahpun memasukkan elemen pendidikan seks dalam Pendidikan Kesihatan Reproduktif dan Sosial (PEERS). Elemen tersebut diajar melalui kurikulum Pendidikan Kesihatan untuk memberi maklumat yang tepat kepada murid dan membantu mereka menjauhkan diri daripada gejala sosial. PEERS diajar kepada semua murid di semua sekolah sejak tahun 1989 di sekolah menengah, dan tahun 1994 di sekolah rendah. Ini bermakna semua murid dari Tahun Satu hingga Tingkatan Lima diajar pendidikan seks melalui PEERS.

Untuk makluman Ahli Yang Berhormat, KPM turut melaksanakan beberapa inisiatif bagi menangani jenayah seksual dalam kalangan murid antaranya ialah:

1. Bekerjasama dengan Pakar Pediatrik, Kementerian Kesihatan Malaysia (KKM), Polis Diraja Malaysia (PDRM), Jabatan Kebajikan Masyarakat (JKM), psikiatrik kanak-kanak serta penasihat undang-undang dalam menangani dan menguruskan kes jenayah seksual melalui Mesyuarat Bulanan Pasukan Penderaan dan Pengabaian Kanak-kanak [*Suspected Child Abuse and Neglect (SCAN Team)*] Hospital Kuala Lumpur;
2. Mengadakan perkongsian kepakaran dan maklumat secara proaktif dengan pelbagai agensi kerajaan dan bukan kerajaan dalam isu-isu berkaitan jenayah seksual terhadap kanak-kanak melalui seminar dan bengkel; dan
3. Melaksanakan Program Pendidikan Kesihatan Reproduktif dan Sosial Remaja di Sekolah (PEKERTI@Sekolah) bermula tahun 2012, yang memberi fokus kepada Kurikulum Pendidikan Kesihatan yang merangkumi 75 peratus komponen PEERS, 15 peratus komponen pemakanan, dan 10 peratus komponen pertolongan cemas. Program ini dilaksanakan dengan kerjasama Kementerian Pembangunan Wanita, Keluarga dan Masyarakat.

**PEMBERITAHUAN PERTANYAAN
DEWAN RAKYAT, PARLIMEN MALAYSIA**

PERTANYAAN : LISAN

TARIKH : 8 MAC 2017
[RABU]

DARIPADA : DATUK ZAHIDI BIN ZAINUL ABIDIN
[PADANG BESAR]

SOALAN :-

YB DATUK ZAHIDI BIN ZAINUL ABIDIN [PADANG BESAR] minta **PERDANA MENTERI** menyatakan berapa peratuskah pemilikan ekuiti korporat usahawan atau pelabur Bumiputera (tidak termasuk pemilikan oleh GLC dan PNB) di Bursa Malaysia ketika ini. Adakah mereka mempunyai keupayaan untuk menjalin hubungan usahasama dengan para pelabur asing yang mahu melabur di Malaysia.

JAWAPAN :-

Tuan Yang di-Pertua,

Untuk makluman Yang Berhormat, sehingga 31 Januari 2017, jumlah syarikat yang disenaraikan di Bursa Malaysia adalah sebanyak 919 buah syarikat dengan nilai pasaran modal ("*market capitalization*") sebanyak RM1.7 trillion. Ini adalah termasuk syarikat Bumiputera dan juga bukan Bumiputera yang tersenarai di Bursa Malaysia. Walau bagaimanapun, terdapat sebanyak 114 buah syarikat Bumiputera telah disenaraikan di Bursa Malaysia.

Bagi mendapatkan data yang tepat, nilai pasaran modal telah digunakan sebagai asas pengukuran peratus pemilikan ekuiti. Ini merupakan kaedah yang biasa digunapakai oleh penganalisis-penganalisis pemilikan ekuiti. Oleh itu, dari 114 buah syarikat Bumiputera, 24 buah syarikat adalah Syarikat Bumiputera Berkaitan Kerajaan Bumiputera (BGLC) seperti Permodalan Nasional Berhad (PNB), Lembaga Tabung Haji, Lembaga Tabung Angkatan Tentera (LTAT) dan lain-lain lagi. BGLC memegang peratusan ekuiti sebanyak 12% (RM201.8b) dari jumlah keseluruhan pasaran modal di Bursa Malaysia. Selebihnya adalah

syarikat milikan atau pelaburan Bumiputera, iaitu sebanyak 4% (RM66.4b) dari jumlah keseluruhan pasaran modal di Bursa Malaysia.

Tuan Yang di-Pertua,

Malaysia mengamalkan sistem ekonomi yang terbuka. Oleh itu, semua syarikat yang tersenarai di Bursa Malaysia termasuklah Syarikat Bumiputera boleh menjalankan usahasama dengan syarikat luar negara berdasarkan kebolehan dan kepakaran mereka. Usahasama dengan syarikat luar negara tidak terhad hanya kepada perkongsian pemilikan syarikat, ia juga meliputi kerjasama dengan syarikat-syarikat asing yang memberi pendedahan dalam perkembangan teknologi dan pemindahan kepakaran. Kerjasama ini membuatkan syarikat bumiputera terus berdaya saing dan kompetitif dalam pasaran terbuka.

Sehingga kini, terdapat beberapa Syarikat Bumiputera yang telah menjalankan usahasama dan kerjasama dengan syarikat luar negara dengan jayanya sehingga sekarang. Kerjasama dengan syarikat kejuruteraan asing telah berjaya mewujudkan satu syarikat usahasama yang menyediakan pelbagai khidmat pakar dimana sebelum ini mereka mengharapkannya dari sumber luar. Hasil dari usahasama ini,

menjadikan Syarikat Bumiputera tersebut lebih berdaya maju dan dapat memperkembangkan bahagian pasaran ("*market share*") ke industri lain yang berkaitan.

Pada masa yang sama, terdapat juga beberapa Syarikat Bumiputera yang telah mewujudkan usahasama dan kerjasama dengan syarikat luar negara tanpa pemindahan kepakaran atau teknologi. Ini secara tidak langsung membuka peluang kepada syarikat luar negara mendapat akses ke pasaran Malaysia tanpa melakukan sebarang pembangunan kapasiti, tambah nilai dan kelestarian terhadap Syarikat Bumiputera.

Sekian, terima kasih.

8 Mac 2017